

Oktòb 2011

konferans jeneral

Pouvwa ekriti yo

ekriti

etid ekriti

pwofèt

Liv Mòmon

Revelasyon

Sentespri

konferans jeneral

Pouvwa ekriti yo

Pa Elder Richard G. Scott

Nan Kolèj Douz Apot yo

Ekriti yo se tankou kolòn limyè ki liminen lespri nou e pèmèt nou jwenn direksyon ak enspirasyon soti anwo.

Sila nan pami nou yo ki vini sou chè sa a pandan konferans lan santi pouvwa priyè nou yo. Nou bezwen yo, e nou remèsyé nou pou yo.

Papa nou ki nan syèl la te konprann ke, pou nou fè pwogè nou swete a pandan peryòd mizaleprèv nou an nan mòtalite a, nou t ap gen pou afwont eprèv difisil. Kèk nan ep eprèv sa yo t ap preske ensimontab. Li te founi zouti pou ede nou reyisi nan mizaleprèv nou nan mòtalite a. Yon gwoup nan zouti sa yo se ekriti yo.

Atravè tout épòk yo, Pè Selès la te enspire dè gason ak fi chwazi pou jwenn, atravè gidans Sentespri a, solisyon pou pwoblèm ki pi konplèks yo nan lavi a. Li te enspire sèvitè otorize sa yo pou ekri solisyon sa yo kòm yon tip manyèl pou sila nan pitit li yo ki gen lafwa nan plan bonè li a ak nan Pitit Gason Byeneme li a, Jezikri. Nou gen aksè lib

nan gidans sa nenpòt kilè, gras avèk trezò nou rele liv kanonik yo---ki se, Ansyen ak Nouvo Testaman an, Liv Mòmon an, Doktrin ak Alyans, ak Pèl Gran Pri a.

Paske ekriti yo soti nan komunikasyon enspire pa Sentespri a, yo se verite pi. Nou pa dwe preyokipe pou valide konsèp ki nan liv kanonik yo puiske Sentespri a sete enstriman ki te motive ak enspire moun sa yo ki te ekri ekriti yo.

Ekriti yo se tankou kolòn limyè ki liminen lespri nou epi pèmèt nou jwenn gidans ak enspirasyon ki soti anwo. Yo ka vin tounen kle pou louvri kanal komunikasyon avèk Papa nou ki nan syèl la ak Ptit Gason Byeneme li a, Jezikri.

Ekriti yo bay deklarasyon nou yo fòs otorite, lè yo site kòrèkteman. Yo ka vin tounen zanmi lwayal ke nou ka konsilte nenpòt ki kote ak nenpòt ki lè. Yo toujou disponib lè nou bezwen yo. Itilizasyon yo founi yon baz verite ki ka aktive pa Sentespri a. Aprann, medite, fouye, ak memorize ekriti yo se tankou ranpli yon amwa avèk zanmi, valè ak verite ke nou ka fè apèl ak yo nenpòt lè, nenpòt kote nan mond lan.

Memorize ekriti yo se kapab sous yon gwo pouvwa. Memorize yon pasaj ekriti se kreye yon nouvèl amitye. Se dekovri yon moun nèf ki ka, ede nan moman bezwen, bay enspirasyon ak rekonfò, epi vin yon sous motivasyon lè yon chanjman nesesè. Paegzanp, lefèt ke m te aprann sòm sa a pa kè, li te tounen pou mwen yon sous pouvwa ak konpreyansyon:

“Se pou Seyè a tè a ye ansanm ak tou sa ki sou li. Lemonn, ak tou sa k'ap viv ladan l’.

“Li mete fondasyon tè a nan fon lanmè, li fè l' chita sou gwo larivyè yo.

“Ki moun ki gen dwa moute sou mòn ki pou Seyè a? oswa ki moun li kite antre nan kay ki apa pou li a?

“Se moun ki pa fè anyen ki mal, moun ki pa gen move lide nan tèt yo. Se moun ki pa nan bay manti, moun ki pa nan fè sèman pou twonpe moun.

“Seyè a va beni moun konsa. Bondye k'ap delivre l' la va fè l' gras” (Sòm 24:1--5).

Medite sou yon vèsè ekriti konsa bay lavi nou gwo direksyon. Ekriti yo ka fòme yon fondasyon ki soutni nou. Yo ka tounen yon gwo resous konsiderab zanmi devwe ki ka ede nou. Yon pasaj ekriti ki memorize vin tounen yon zanmi konstan ke lwayote li pa febli avèk letan.

Medite sou yon pasaj ekriti kapab yon kle pou bay aksè a revelasyon ak gidans ak

enspirasyon Sentespri a. Ekriti yo ka kalme yon nanm twoouble, ki pote lapè, espwa, epi rebay moun nan konfyans nan kapasite li pou simonte difikilte lavi yo. Yo gen pouvwa puisan pou geri blesi emosyonèl si yon moun egzèse lafwa li nan Sovè a. Yo ka akselere gerizon fizik.

Ekriti yo ka pran sans diferan nan diferan moman nan lavi nou selon bezwen nou. Yon pasaj ekriti ke nou li plizyè fwa deja kapab pran yon sans nouvo ki trè enstriktif ak enspiran lè n ap afwonte yon nouvèl eprèv nan lavi a.

Kijan ou itilize ekriti yo pèsonèlman? Èske ou ekri nan liv ekriti pa w la? Èske ou mete kòmantè nan maj la pou raple ou yon moman gidans espirityèl oswa yon eksperyans ki te anseye ou yon lesон enpòtan? Èske ou itilize tout liv kanonik yo, enkli Ansyen Testaman an? Nan paj Ansyen Testaman yo, mwen konn jwenn verite presye ki se eleman kle nan fondman verite ki gide lavi m nan epi ki sèvi kòm yon resous pou mwen lè m ap eseye pataje yon mesaj nan levanjil la avèk lòt moun. Se pou rezon sa a mwen renmen Ansyen Testaman an. Mwen jwenn verite tankou bijou presye ki epapiye nan tout paj li yo. Pa egzanp:

“Epi Samyèl te di, kisa Senyè a pito: yon moun k ap ofri bêt pou boule nan dife, k ap fè tout kalite ofrann bêt pou li, osinon yon moun k ap fè sa li di 1 fè a? Pito yon moun soumèt devan Bondye pase pou l ofri bèl belye chatre pou Senyè a” (1 Samyèl 15:22).

“Mete tout konfyans ou nan Senyè a. Pa gade sou sa ou konnen.

“Toujou sonje Senyè a nan tou sa w ap fè. Li menm, la moutre ou chemen pou ou pran.

“Pa mete nan tèt ou ou gen plis konprann pase sa. Gen krentif pou Senyè a, refize fè sa ki mal. . . .

“Pitit mwen, lè Senyè a ap pini ou, pa betize ak sa. Lè l ap korije ou, pa dekoraje.

“Paske Senyè a korije moun li renmen, menm jan yon papa korije pitit li renmen anpil la.

“Ala bon sa bon pou moun ki gen konesans, pou moun ki rive gen bon konprann” (Pwovèb 3:5 -7, 11-13).

Nouvo Testaman an se yon sous verite presye tou:

“Jezi reponn li: Se pou ou renmen Mèt la, Bondye ou, ak tout kè ou, ak tout nanm ou, ak tout lide ou.

“Se kòmandman sa a ki pi gwo, ki pi konsekan.

“Men dezyèm kòmandman an ki tankou li: se pou ou renmen frè parèy ou tankou ou renmen pwòp tèt pa ou.

“De kòmandman sa yo, se yo ki fondasyon tou lalwa a ak pwofèt yo” (Matye 22:37--40).

“Epi Senyè a te di, Simon, Simon, koute: Satan mande pouvwa pou l pase ou nan laye, tankou gress y ap vannen:

“Men, mwen lapriyè pou ou, pou lafwa ou pa febli. Ou menm, lè wa tounen vin jwenn mwen, bay frè ou yo fòs.

“Epi li te di li: Mèt, mwen pare pou m al nan prizon avè ou, pou m mouri menm avè ou.

“Epi li te di: Pyè, tande sa m ap di ou: kòk p ap gen tan chante jòdi a, w ap di ou pa konnen m pandan twa fwa. . . .

“Yon sèvant wè Pyè chita bò dife a; li fiske je l sou li, li di: Nonm sa a te avèk li tou.

“Men Pyè demanti l, li di: Madam, mwen pa konnen li.

“Yon kadè apre, yon lòt wè l, epi l di: Ou menm tou, ou fè pati moun sa yo. Pyè di: Non, monchè, mwen pa fè pati moun sa yo.

“Apre yon bon ti moman, yon lòt di l ankò: Men wi, nonm sa a te avè l. Se moun Galile li ye.

“Epi Pyè di li: Monchè, mwen pa konnen sa ou ap di la a. Menm lè a, antan li t ap pale toujou, yon kòk pran chante.

“Epi Jezi vire, li gade Pyè, epi Pyè vin chonje pawòl Senyè a te di l: Jòdi a, kòk p ap gen tan chante, w ap di ou pa konnen mwen pandan twa fwa.

“Pyè soti, epi li tonbe kriye jouk li pa t kapab ankò.” (Lik 22: 31--34, 56--62).

Mwen santi kè m ap rache pou sa k te rive Pyè a nan okazyon sa a.

Ekriti sa a nan Doktrin ak Alyans yo te beni lavi m anpil: “Pa chèche deklare pawòl

mwen an, men chèche pou ou jwenn pawòl mwen an, epi apre sa lang ou va lage; apre sa si ou vle, w ap gen Lespri m ak pawòl mwen an, wi, pisans Bondye pou konvenk lèzòm (D&A 11:21).

Nan jijman pa mwen, Liv Mòmon an anseye laverite avèk yon klate ak pouvwa san parèy. Paegzanp:

“Epi kounyeya, m ta vle pou nou gen imilite, pou nou soumi, e pou nou janti; pou nou pran pitye fasil; pou nou chaje avèk pasyans, ak pasyans san limit; pou nou tanpere nan tout bagay; kenbe kòmandman Bondye yo tout tan avèk dilijans; mande nenpòt sa nou bezwen, ni bagay espirityèl ni bagay tanporèl; pou nou toujou di Bondye mèsi pou tout sa nou resevwa.

Epi m ta vle pou nou gen lafwa, esperans, ak charite, e lè sa a, n ap toujou fè anpil bon zèv.” (Alma 7:23--24)

Epi yon lòt:

“Epi charite gen pasyans, li janti, li pa gen anvi, li pa chaje avèk lògèy, li pa chèche enterè pa l, li pa fache fasil, li pa panse mal, li pa pran plezi nan inikite men, li pran plezi nan verite, li sipòte tout bagay, li kwè tout bagay, li espere tout bagay, li andire nan tout bagay.

“Se poutèt sa, frè byeneme m yo, si nou pa gen charite, nou pa anyen, paske charite pa janm peri. Se poutèt sa apiye sou charite, ki se pi gwo don pase tout lòt, paske tout bagay gen pou peri---

“Men charite se lanmou pi Kris la, e li dire pou tout tan; e nenpòt moun ki genyen l nan dènye jou a, l ap bon pou li.

“Se poutèt sa, frè byeneme m yo, priye Papa a avèk tout enèji kè nou, pou nou kapab chaje avèk lanmou l, li te devèse sou tout moun ki se vrè disip Ptit Gason li a, Jezikri, pou nou kapab vin tounen pitit Bondye; pou lè l parèt, pou nou kapab tankou l, paske n ap wè li jan li ye a; pou nou kapab gen esperans sa a; pou nou pirifye menm jan li pi a.” (Moroni 7:45--48).

Madam cheri mwen, Jeanene, te renmen Liv Mòmon an. Pandan jenès li, lè l te adolesan, li te vin tounen yon fondasyon pou lavi li. Li sete yon sous temwayaj ak ansèyman pandan sèvis li kòm misyonè aplentan nan Nòdwès Etazini. Lè nou te sèvi nan chan misyon Kòdoba, an Ajantin nan, li te fòtman ankouraje itilizasyon Liv Mòmon an nan efò nou pou n te preche levanjil la. Jeanene te konfime bonè nan lavi li, ke moun ki li

Liv Mòmon an regilyèman yo, resevwa benediksyon pou gen yon pòsyon siplemantè Lespri Senyè a, yon pi gwo detèminasyon pou obeyi kòmandman li yo, ak yon temwayaj pi solid sou divinite Pitit Gason Bondye a.1 Pandan m pa konn ki kantite ane, lè fen ane a ap pwoche, m te toujou wè li chita an silans, ap veye pou l fin li Liv Mòmon an an antye yon lòt fwa ankò anvan fen ane a.

An 1991 m te vle bay fanmi m yon kado Nwèl espesyal. Yon nòt nan jounal pèsomèl mwen sou akonplisman dezi sa a deklare: “Li minui trantuit, Mèkredi 18 Desanm 1991. Mwen fèk fini yon anrejistreman odyo sou Liv Mòmon an pou fanmi mwen. Se yon eksperyans ki ogmante temwayaj mwen konsènan zèv divin sa a epi ki ranfòse dezi mwen pou m vin pi familye avèk paj li yo pou simaye, apati ekriti sa yo, verite pou m itilize nan sèvis mwen pou Senyè a. M renmen liv sa a. Mwen temwaye avèk tout nanm mwen ke li vrè, ke li te prepare pou benediksyon mezon Izrayèl la, ak pou tout diferan manm li yo ki simaye nan tout mond lan. Tout moun ki ap etidye mesaj li a avèk imilite, kwayan avèk lafwa nan Jezikri, ap konnen verasite li epi ap jwenn yon trezò ki ap mennen yo nan pi gwo bonè, lapè, ak akonplisman nan lavi sa a. Mwen temwaye pa tout sa ki sakre, ke liv sa a vrè.”

Mwen priye pou nou chak pwofite de richès benediksyon ki soti nan li ekriti yo. Nan non Jezikri, amèn.